

Inzko informirao zamjenika državnog tajnika SAD-a Steinberga o prijetnjama Mirovnom sporazumu za BiH



Bosna i Hercegovina je suočena sa najozbiljnijim prijetnjama Daytonskom mirovnom sporazumu od kada je potpisan 1995. godine, izjavio je visoki predstavnik i posebni predstavnik EU u Bosni i Hercegovini Valentin Inzko prilikom susreta sa zamjenikom državnog tajnika SAD-a Jamesom Steinbergom danas u Washingtonu.

U proteklih godinama, suverenitet, teritorijalni integritet i funkcionalnost BiH stalno su bili predmetom sve većeg osporavanja. Sada, sedam mjeseci nakon izbora, još nema izgleda za formiranje nove vlade na državnoj razini, a proces euro-atlantskih integracija je zaustavljen. Prošlog mjeseca, Narodna skupština RS donijela je odluku o održavanju referenduma usmjerenog protiv državnih pravosudnih institucija i ovlasti visokog predstavnika koja je dobio od UN-a. Ovaj potez predstavlja prijetnju samim temeljima na kojima počiva mir u BiH u proteklih 15 godina.

“Odgovor međunarodne zajednice na ove aktivnosti mora biti odlučan i jedinstven, kazao je visoki predstavnik i posebni predstavnik EU Inzko.

Ustav Bosne i Hercegovine, koji je također i Aneks 4 Mirovnog sporazuma, ne dozvoljava niti jednom od entiteta u Bosni i Hercegovini da odbacuju nadležnost državne institucije.

“Političari u RS to znaju i trebaju znati da je podrivanje Mirovnog sporazuma opasna politička avantura – i to avantura koja može imati nepredvidive posljedice”, rekao je visoki predstavnik i posebni predstavnik Inzko. “Naš zajednički odgovor na ovo bit će također i rano testiranje Službe za vanjske poslove Europske unije”, kazao je Inzko.

Na trenutačni razvoj situacije ne treba gledati kao na kratkoročnu krizu, nego kao na kulminaciju nesretnih događaja u nekoliko posljednjih godina, što ukazuje na potrebu kontinuiranog međunarodnog prisustva u BiH.

“BiH još nije postigla političku stabilnost koja joj je potrebna da dalje nastavi samostalno”, istaknuo je visoki predstavnik Inzko. “Potreba za međunarodnim prisustvom sa izvršnim ovlastima poput onih koje imaju Ured visokog predstavnika i EUFOR je evidentna”. Međunarodna zajednica treba sačuvati dovoljno instrumenata da spriječi pokušaje poništavanja ranijih postignuća u izgradnji države i stvaranja nestabilnosti, što bi moglo imati negativne posljedice za cijeli region.

Visoki predstavnik je zahvalio zamjeniku državnog tajnika Steinbergu za snažan i konstruktivan angažman Sjedinjenih Država u BiH, uključivši i njihovu suštinsku ulogu u Vijeću za provedbu mira.